

南湖集

一

集

南
山
集

南湖集

刻南湖集緣起

南湖集宋循王曾孫張公約齋所著集成於嘉定庚午
故不見收於晁氏讀書志而陳氏書錄解題及宋史藝
文志亦不詳其目惟明文淵閣及葉氏荃竹堂書目並
載南湖集五冊其餘藏書家罕有著錄者

國朝順治己丑慧雲住僧行盛纂輯寺志求公詩文渺
不可得則此集之佚信已久矣恭遇

聖天子右文稽古

命儒臣檢集永樂大典中遺籍彙入四庫全書於是

歷代名家詩之散見於各韻者俱得裒錄成帙而約齋之詩始出諸體具備以類相從釐爲詩九卷詞一卷据方萬里題詞稱其前集二十五卷三千餘首茲所得者計詩一千十七首詞七十八闕雖較方所稱僅三之一而已燦然可觀矣博於武林先哲遺書頗多採輯嚮者張助教潛亭入都會以搜求未備爲託閱歲書來以館中新得南湖集見報未幾助教忽歸道山繼而邵太史二雲聞之赴官之後亟求館中校定副本傳鈔一編適沈侍御蘆士南歸寄以相示熟復數過見集中諸作

大半皆紀所居南湖桂隱玉照諸勝及與同時士夫遊
讌酬答之篇公捨宅所建之慧雲寺頽圯未盡今過其
處水雲飛淼菰蔣叢生而雉堞之環列依然禽魚之翔
泳如昨皆可因詩而想見其園居之樂也公之事蹟散
在雜說其淡忘榮仕具詳寺碑而丰儀秀整則塑像儼
然今者襲公之詩拜公之像恍如與公晤語焉夫公之
於詩善參活法遠宗香山於唐而近則得力於誠齋放
翁諸人誠齋至以上將目之雖同時忌之者謂爲將家
子強吟小詩而不能掩也是集湮沒者六百餘載遭逢

盛世晦者復顯公之厚幸非偶然矣謹依 館閣原編

校寫既畢偶檢志乘補其漏佚至於遺文逸事與夫後人景仰題詠之作亦輯而附焉爰付剞劂以廣流傳開雕於庚子初冬竣工於辛丑首夏爲文告公以志盛事并詳其緣起於首簡云

乾隆四十六年歲次辛丑閏夏既望鮑廷博謹識

約齋南湖集序

初予因里中屠德璘談循王之曾孫約齋子有能詩聲
予固心慕之然猶以爲貴公子未敢卽也旣而訪陸務
觀於西湖之上適約齋子在焉則深目顰蹙寒眉臃膝
坐於一草堂之下而其意若在巖壑雲月之外者蓋非
貴公子也始恨識之之晚旣而又從尤延之京仲遠過
其所居曰桂隱者於是盡出其平生之詩蓋詩之癯又
甚於其貌之癯也大抵祖黃陳自徐蘇而下不論也延
之仲遠退而深嘉之予笑而不言二君曰子奚笑約齋

子予曰彼其先王翼真主以再造王家大忠高勲塞兩
儀而貫三光爲之子若孫者謂宜掉馬箠鳴孤劒略中
原以還天子若夫面有敲推之容而吻秋蟲之聲與陰
何郊島先登優入於飢凍窮愁之域此我輩寒士事也
顧汲汲於此而於彼乎悠悠爾此予之所以笑約齋子
也二君曰子之笑約齋子祇所以嘉約齋子歟予出守
高安約齋子寄其詩千餘篇曰南湖集且諭予序之乃
書其說於篇首云約齋子張氏名鑑字功父淳熙己酉
四月庚辰誠齋野客廬陵楊萬里序

右序從楊文節公誠齋集第八十一卷錄補乾隆丁未正月初十日鮑廷博記

題詞

讀張功父南湖集

并序

方回萬里

詩至于老杜而集大成陳子昂沈佺期宋之問律
體沿而下之麗之極莫如玉溪以至西崑工之極
莫如唐季以至九僧三百五篇有麗者有工者初
非有意於麗與工也風賦比興情緣事起云耳而
麗之極工之極非所以言詩也謂如老杜七言律
詩魚吹細浪搖歌扇燕蹴飛花落舞筵自去自來
堂上燕相親相近水中鷗林花著雨胭脂落水荇

牽風翠帶長風含翠篠娟娟靜雨裊紅蕖冉冉香
學者能學此句未足爲雄撲棗詩云不爲困窮寧
有此祇緣恐懼轉須親憶梅詩云幸不折來傷歲
暮若爲看去亂鄉愁春菜詩云巫峽寒江那對眼
杜陵野老不勝悲送僧詩云念我能書數字至將
詩不必萬人傳此等詩不麗不工瘦硬枯勁一幹
萬鈞惟山谷後山簡齋得此活法又各以其數萬
卷之心胸氣力鼓舞跳盪初學晚生不深於詩而
驟讀之則不見奧妙不知雋永乃獨喜許丁卯體

作偶儷嫵媚態予平生不然之而江河友朋未易
以口舌爭也乾淳以來稱尤楊范陸而蕭千巖東
夫姜梅山邦傑張南湖功父亦相伯仲梁溪之矯
淡細潤誠齋之飛動馳擲石湖之典雅標致放翁
之豪蕩豐腴各擅一長千巖格高而意苦梅山律
熟而語新南湖生於紹興癸酉循忠烈王之曾孫
近得其前集二十五卷三千餘首嘉定庚午自序
蓋所謂得活法於誠齋者生長於富貴之門輦轂
之下而詩不尙麗亦不務工洪景盧謂功父深目

而予謂其詩亦猶其爲人也溪清花鴨聚岸綠
草蟲多燕子初歸曾識面牡丹未放已知名不知
何人以朱筆加點專取此等句子亦謂不然且如
人生守定梅花死此句殊佳何人輒用朱筆圈改
予竊謂朱筆之人未得所謂正法眼藏也功父預
謀誅韓而史忌之韓旣誅卽有桐川之謫後得歸
坐前憾謫死象臺天下冤之言官程松嘗論功父
謂將家子強吟小詩此乃刻薄無忌憚之言不足
與較其詩活法妙處予未能盡舉當續書之今且

題八句以寄予心

生長勳門富貴中
粃糠將相以詩雄
端能活法參誠叟
更覺豪才類放翁
舉似今人誰肯信
元來妙處不全工
登金組繡同時客
合向南湖立下風

功父盡交一世名
彥詩集可攷然
南渡以來精於
四六而顯者詩
輒凝滯不足觀
駢語橫於胸中
無活法故也然則
紹聖詞科誤天下
士多矣

南湖集卷第一

秦川張鎡功甫

五言古詩

雜興

聖學律萬世玉振仍金聲大賢務矯俗始以和自名
智者稽所終流弊固難行求圓能捨規魯男烏可輕

城河固金湯穀帛堆丘山雷風走號令足以威百蠻
秦人昔恃此燒書無愧顏叢祠夜篝火赤蛇先據關
誰知小國魯抗衡齊晉閒獨能秉王禮足以銷鄰姦
舞干服

三苗可仰其可攀

原子何所得所得在養心澹然處窮閭蓬蒿絕車音結
駟者誰子排門願同襟乃知能辯者於道未爲深

日暮前道遠紛紛倒行多胡不秉明燭整駕歷前坡旣
衰不戒得有如聖賢何平公七十翁師曠猶琢磨

管仲相齊國童子猶羞稱確守害霸說三王亦可成寸
短有所長貪賢況誠切莫問九合功詠此宜擊節

文仲蔽展禽難逃竊位名張湯法家流推賢被嘉聲公
道日月如無私天下行治古本根此所以休甲兵嗟嗟